

Huesnan

E buki di Huesnan ta duna un bista di e era den Israel su historia entre Josué su morto i establesementu di un monarkia (ku un rei) na Israel.

Josué a konkistá a Tera Primintí en general. Ma tabatin hopi siudat i teritorio lokal ku no a wòrdu konkistá ainda. Josué a parti a tera na a tribunan. Kada tribu a keda responsabel pa kaba konkistá nan teritorio i destruí e enemigunan ku tabata biba ei, segun Dios Su mandamentu.

Ma hopi di e tribunan no a obedesé Dios por kompleto. E buki di Huesnan ta un relato di e konsekuensia di nan desobediensia. Pasobra Israel no a likidá e kananeonan, nan enemigunan a logra haña poder riba Israel!

Huesnan ta un buki ku ta papia tokante e relashon di Israel pa ku Dios. Dios a hasi promesanan maraviyoso pa ku Abraham i su desendientenan. El a kumpli ku Su parti di e aliansa, a hiba nan na Kanaan, i a empoderá nan pa konkistá e tera ku El a primintí nan. Ma despues di tur Dios Su bendishonnan, nan a rebeldiá kontra dj'E. Nan no a kumpli ku nan banda di e aliansa.

Kiko lo ta Dios santu Su reakshon? Lo E kumpli ku Su promesanan pa ku Israel maske nan a rebeldiá kontra dj'E? Ta kasi impusibel pa lesa e buki di Huesnan sin keda impreshoná ku e kompashon i pasenshi di Dios. Lesando e buki ku un kurason habrí, lo bo mira bo mes defektonan, i na mesun tempu keda asombrá ku e mesun Dios a demosntrá tantu pasenshi pa ku bo!

Ta lastima ku e era di e huesnan ta forma parti di e historia di Israel. Ma apesar di tur e pikánan i frakasonan menshoná den e buki aki, nos no por elimin'é for di Beibel. Dios Su palabranan dirigí na Su pueblo dor di e profeta Jeremias ta apropiá: *“Mi a hiba boso na un tera fruktífero...ma boso a bin kontaminá Mi tera, i boso a hasi Mi erensia un abominashon”*. Maske nos no por eliminá e historia pretu aki, nos por siña for di dje.

I. NÒMBERNAN DI E BUKI

E nòmber hebreo pa e buki aki tabata SHOPHETIM, nifikando “hues” òf “lider ehekutivo”. Septuigenta (e tradukshon griego di Tèstamènt Bieu) a yama e buki KRITAI, ku e mèsun nifikashon.

E buki ta haña su nòmber for di su kontenido. Huesnan ta deskribí e historia di Israel durante tempu ku Israel tabata un teokrasia—Dios tabata e Rei invisibel. Ma Dios a lamta lidernan humano pa guia Israel. E lidernan aki tabata yamá “huesnan”.

Ora nos ta tende e palabra “hues”, nos ta pensa mes ora di nos konteksto moderno. Ma nos impreshon no ta kuadra ku e tarea di un hues e tempu ei. Den e buki, “hues” ta usá di Dios ún biaha komo e Hues supremo di Israel (11:27). Seis biaha “hues” ta usá pa deskribí e libertadó ku Dios a skohe (2:16-19). I ta bisá ku ocho persona a huzga Israel: Otoniel (3:10); Tola (10:2); Jair (10:3); Jefte (12:7); Ibzan (12:8); Elon (12:11); Abdon (12:13); Samson (15:20; 16:31). Un dama tambe ta deskribí kono un hues, Debora (4:4).

E huesnan tabata e lidernan òf gobernantenan di Israel durante e era aki. Den hopi kaso, nan tabata lidernan militar ku a reskatá Israel for di nan oprimidornan, anto a sigui goberná despues ku a puebel a wòrdu libra.

Tambe ta hopi importante pa komprenyé ku nan tabata gobernantenan mas *lokal* na lugá di nashonal. Nan no tabata reinan ku a goberná henter e pais di Israel.

II. FECHA DI E BUKI

En general ta pensá ku e eksodo a tuma lugá na mas òf ménos aña 1446 B.C. Si nos ta kita e añanan ku Israel tabata den desierto, e añanan ku e konkísta a tuma lugá, i e añanan ku Josué tabata e lider di Israel, por bisa ku e eventonan deskribí den e buki a sosodé entre 1374 i 1075 B.C.

Ma ki tempu e buki a wòrdu skirbí? E buki mes ta duna sierto indikashon:

A. Huesnan a wòrdu skirbí promé ku Tiro a bira e stat mas renombrá na Fenisia. Sidon tabata e stat prinsipal promé. E echu ku 3:3 ta menshoná e “sidonionan” sin referí na Tiro ta duna e impreshon ku Tiro no tabata destaká ainda. Tiro a kuminsá bira prominente despues di síglo 12 BC

B. Huesnan sigur a wòrdu skirbí promé ku Salomon a kasa ku yu muhé di farao. Huesnan 1:29 ta indiká ku kananeonan tabata biba na Gezer. Segun 1 Reinan 9:16, farao a konkistá Gezer, matando a kananeonan, i a dun’é na su yu muhé komo regalo di kasamentu. Esei lo ta tuma lugá na mas òf ménos 970 B.C.

C. E buki a wòrdu skirbí promé ku David a konkistá Yerusalem. Segun Huesnan 1:21, e jebuseonan a biba na Yerusalem “*te dia djawè*”. David a reina riba e tribu di Juda pa shete aña. Ma ora el a bira rei di tur diesdos tribu di Israel, el a konkistá Yerusalem (2 Samuel 5:6-9; 1 Krónikanan 11:4-8) i a hasi e siudat ei kapital di e reino uní. Esaki lo ta tuma lugá mas òf ménos na aña 990 B.C.

D. Ma e outor a skirbi e buki despues ku Israel tabatin un rei. Huesnan ta ripiti e frase, “*Den e dianan ei no tabatin rei na Israel...*” (17:6; 18:1; 19:1; 21:25) dunando e impreshon kla ku e outor a bisa esei pasobra na momentu ku e tabata skirbi, tabatin un rei na Israel. Sikiera Saul lo mester tabata rei kaba. Saul a kuminsá reina mas òf ménos na aña 1050.

Ta notabel ku e pueblito di Bètlehèm (na Juda) ta menshoná diferente biaha den e buki (17:7-9; 19:1-2). Talbes esei ta indiká ku e buki a wòrdu skirbí durante era ku un habitante di Bètlehèm tabata rei, David.

Ta parse ku e buki a wòrdu skirbí entre 1050 i 990 B.C., talbes na komienso di reinado di David. David a reina di 1010 te 970 B.C. Pues, un fecha rasonabel por ta entre aña 1005 i 1000 B.C.

Tin un teksto sinembargu ku ta lamta pregunta pa ku e fecha aki. Na final di storia tokante e mudansa di e tribu di Dan, 18:30 ta laga sa ku siertu famia a sirbi komo “*saserdote pa e tribu di e danitaan te di ku e tera a wòrdu hibá den koutiverio.*” Algun estudiante di Beibel ta haña ku esaki ta referí na tempu di e eksilio (despues di 586 B.C.). Ma ta pusibel ku e outor tabata referí na un tempu ku e tribu di Dan a wòrdu hibá den koutiverio. Un otro pusibilidat ta ku e outor tabata papia di e invashon di filisteonan durante e tempu ku e arka tabata na Silo (1 Samuel 4:1-11) òf tempu ku Saul a muri den guera kontra e filisteonan i su yu, Is-boset a reina for di otro banda di e riu Jordan (2 Samuel 2:8-9).

III. OUTOR DI E BUKI

Buki di Huesnan no ta indiká ken e outor tabata. Ma ta visto ku e buki tabata skirbí di un perspektiva di un predikador. E outor no solamente tabata un historiadó skirbiendo historia. Mas bien e outor no a paga tantu atenshon na kronologia. E tabata ke prediká un sermon, mustrandu kla ku Israel su prosperidat a dependé di su relashon pa ku Dios. Tur e historia di Israel den e buki ta midí segun nan fieltad na Dios. Un frase ku ta demosntrá esaki bon kla ta e frase ku ta

ripití den e buki, “...e yunan di Israel a hasi maldat den bista di SEÑOR” (2:1; 3:6,12; 4:1; 6:1; 10:6; 13:1).

Segun Talmud hudiu, Samuel tabata outor di e buki. Talbes esei ta e kaso. Ma e echu ku Samuel a oponé kontra un monarkia na Israel ta hasi e pusibilidad aki ménos aseptabel. Un otro pusibilidad ta ku e por tabata un alumno òf kolega di Sameul ku tabata ménos antipátiko pa ku e monarkia.

Ta parse ku e outor a hasi uso di diferente dokumento ku tabata eksistí kaba. E outor por a kompila diferente dokumento, manera kantika di Debora i Barak (5), fábula di Jotam (9:7-20), kartanan di Jefta i rei di Amon (11:12-27), notúlonan di reunion na Mizpa (20), èts. Pues, tin evidensia ku e outor a inkorporá informashon di otro dokumentonan.

Di tur manera, ta parse ku ún persona so lo a kompilá e ahustá e informashon pa forma e buki. I e buki tabata skirbí preinsipalmente pa benefisio di e pueblo di Israel i e generashonnan ku lo sigui.

IV. PROPOSITO DI E BUKI

Meskos ku e buki di Josué, e buki di Huesnan no ta bèrdaderamente un buki históriko. E outor ta salta hopi evento òf ta mensioná otro eventonan sin detaye. En kontraste, otro eventonan ta spliká detayadamente. Por ehèmpel, e outor ta duna hopi espasio (kuater kapitulo) pa e storianan di Samson, mientras e hues, Samgar, ta mensioná den ún versíkulo so (3:31).

Klaramente e outor tabata hopi selektivo den e informashon ku el a usa. Pakiko e tabata selektivo? Dios tin siertu lès pa siña e lektornan dor di lesa e buki aki...E tin un proposito!

Meta di e outor no tabata pa glorifiká algun antepasado renombrá di Israel. Mas bien, el a glorifiká Dios pa Su gracia pa ku Israel.

Ta parse ku algun di Dios Su propositonan pa e buki tabata:

- Pa kontinuá ku e historia di Israel for di tempu di morto di Josué te era di Samuel.
- Pa mostra Israel su frakaso—komo un teokrasia—di no keda fiel na su aliansa ku Dios, asta bou guia di hòmbenan skohí pa Dios ku a libra nan di opreshou di mundu pagano.
- Pa mostra ku Israel su kondishon spiritual (su piká) a determiná su kondishon polítiko i material. Ora Israel a ignorá Josué su spiertamentu i a adorá e diosnan di Kanaan, diktadónan i konkistadónan a dominá nan. Ma ora e nashon a bolbe na Dios ku obediensia, Dios den Su gracia a reskatá nan for di opreshon.

Esaki sin duna ta un di e propositonan prinsipal di e buki. E buki aki ta splika kon Israel a hañ’é den un situashon religioso, polítiko, i moral tan deplorabel (pa motibu di piká). E ta deskribí e situashon, mustrandu e afektonan di nan piká riba e nashon.

- Pa mostra ku Israel tabatin mester di un monarkia sentralisá, pa solushoná e anarkia ku a eksistí durante e era di e huesnan. Ta parse ku e outor ke demonstrá ku gobernashon pa medio di huesnan no tabata e solushon i ku monarkia ta mas bentahoso. Dependiendo e fecha ku a buki a wòrdu skirbí, talbes e ta mostra ku e monarkia a logra loke e huesnan no tabata por: un konkísta kompleto di e teritorio, establesementu di lei, i stabilitat.

V. STRUKTURA I KONTENIDO DI E BUKI

Storianan di e.huesnan ta hañá mayoria di e espasio den e buki (Huesnan 3-16). Ma promé ku e storianan tin un prólogo (Huesnan 1:1-2:5) ku ta konta di e periodo di tempu ku kada tribu a keda pa kaba konkistá su teritorio. E prólogo ta splika kiko a okashoná e kondishonnan tristu. Na final di e buki tambe tin un epílogo (17:1-21:25). E epílogo ta duna dos ilustrashon—ilustrando e kondishonnan mes durante e era ei. Ta parse ku e énfasis ta riba e desòrdu ku a eksistí ku e ousensia di un rei.

- I. PRÓLOGO SPLIKATIVO - 1:1-2:5
- II. HUESNAN DI ISRAEL - 2:6-16:31
 - A. Introdukshon – 2:6 – 3:6
 - B. Otoniel – 3:7-1
 - C. Aod – 3:12-30
 - D. Samgar – 3:31
 - E. Débora i Barak – 4:1 – 5:31
 - F. Gideon – 6:1 – 8:33
 - G. Agregashon: Reino di Abimelek – 9:1-56
 - H. Tola – 10:1-2
 - I. Jair – 10:3-5
 - J. Jefte – 10:6 – 12:7
 - K. Ibban – 12:8-10
 - L. Elon – 12:1-12
 - M. Abdon – 12:13-15
 - N. Samson – 13:1 – 16:31
- III. EPÍLOGO ILUSTRATIVO - 17:1-21:25
 - A. Tribu di Dan su mudansa pa muda nort – 17:1 – 18:31
 - B. Guerra sivíl kontra tribu di Benjamin – 19:1 – 21:25

Laga nos para ketu un ratu i ripará algun punto relashoná ku e divishonna prinsipal:

1. Prólogo splikativo. Tur e informashon den e buki di un òf otro manera ta papia tokante e dekadensia polítiko, sosial, moral, i religioso entre e periodo di e morto di Josué i establesementu di e monarkia. E promé sekshon ta mostra ku e konkísta di Kanaan tabata inkompleto i ta splika dikun. Kada tribu a keda pa kompletá e konkísta pa ku nan mes teritorio. E lista di tribunan den kapítulo ún ta kuminsá ku e tribunan eksitoso i ta kaba ku esnan derotá. Kapítulo ún ta mostra ku Juda i Simeon so tabatin éksito komploto. E otro tribunan mensioná no a logra konkistá e kananeonan i a sufri resultadonan desastroso.

2. Huesnan di Israel. Den e di dos divishon, por mira e síklo kontínuo di apostasia (bandoná Dios), sigui pa huisio, repintimentu, liberashon, finalisando ku sosiegu, pa kuminsá un otro síklo inisiá pa apostasia. Ora kos a bai bon, e pueblo di Israel a bandoná Dios i a sufri e konsekuensianan. E storianan den e sekshon aki ta presentá na un manera organisá. Atrobe por ripará deteriorashon den e kapítulonan aki. E storia di Abimelek ta demonstrá e lucha entre israelitanan i kananeonan na Sikem (9:1-57) pasobra Israel no a destruí e kananeona. Ta parse ku despues di era di Abimelek, no tabatin pas mas. Gedeon (8:1-3) a logra evitá guerra sivíl. Ma Jefte no a evitá esei (12:1-6). E storianan di Samson no ta indiká ku el a logra libra Israel for di e filisteonan. E outor a konta e storia di Samson sin komentario, kasi komo sifuera e storia mes ta demonstrá e dekadensia personal i nashonal klaramente.

3. Epílogo ilustrativo. E último sekshon ta kontené dos portrèt di e kondishonnan deplorabel di e era di e huesnan. Den komienso di e buki (1:34-36), e tribu di Dan a haña nan den un situashon sumamente difísil. E situashon a bira tan insoportabel ku nan a muda pa un parti nort na Israel (18:1-31). E último kapítulonan ta konta di guerra sivíl, i apenas un tribu no a wòrdu likidá (19-21). E teksto ta duna e implikashon kla (17:6; 18:1; 19:1; 21:25) ku tur e desòrdu aki a eksistí pasobra no tabatin un rei na Israel.

VI. OPSERVASHONAN DI E BUKI

Nos lo nota diferente punto den e buki di Huesnan.

A. KRONOLOGIA DI E BUKI

E kronologia di huesnan ta difísil pa sa presis. Mas ku kuarenta diferente teoria a wòrdur proponé pa solushoná e kronologia. Tòg e ta keda un misterio. Lo siguiente, ta e kronologia revisá ku Gleason Archer a proponé.

HUES	NASHON ENEMIGU	AÑANAN DI OPRESHON	AÑANAN DI LIBERTAT	FECHA	TEKSTO
Otoniel	Mesopotamia	8	40	1374-1334	3:9-11
Aod	Moab, Amon, Amalek	18	80	1316-1235	3:15-30
Samgar	Filistia			1230	3:31
Débora & Barak	Kanaan	20	40	1216-1176	4:4-5:31
Gideon	Madian	7	40	1169-1129	6:11-8:35
Tola			23	1120-1097	10:1-2
Jair			22	1120-1097	10:3-5
Jefte	Amon	18	6	1085-1079	11:1-12:7
Ibzan			7	1079-1072	12:8-10
Elon			10	1072-1062	12:11-12
Abdon			8	1062-1054	12:13-15
Samson	Filistia	40	20	1095-1075	13:2-16:31

E problema ta, si nos ta pone tur e añanan di opreshon i libertat serka otro, nos tin un suma di 407 aña. Segun 1 Reinan 6:1, tabatin un periodo di 480 aña for di tempu ku Israel a sali for di Egipto te ku nan a kuminsá konstruí e tèmpep durante reinado di Salomon. Si nos ta kita 407 for di 480, esei ta laga solamente 63 aña. Esei ke men ku e añanan promé ku e huesnan i e añanan despues di e huesnan (te fecha ku Salomon a kuminsá konstruí e tèmpep) no por suma mas ku 63 aña. Ma esei ta impusíbel. Israel tabata den desierto pa 40 aña, e konkísta di Kanaan lo a dura basta aña, i Josué no a muri te ora e tabatin 110 aña. E 63 aña tampoko no ta inkluí e 40 aña ku Elí tabata lider di Israel, ni e añanan ku Samuel tabata hues, ni tampoko e reinadonan di Saul i David a suma 80 aña adishonal. Klaramente nos tin ku ahustá nos kronologia.

E solushon mas probabel di nos perspektiva ta ku fásilmente por tabatin diferente hues na Israel na e mesun tempu. Nos no mester pensa ku kada hues a goberná henter e pais di Israel. Ta parse ku mayoria di e huesnan tabatin outoridat mas lokal. Por ehèmpel, Otoniel tabata di e tribu di Juda te na parti sùit. Samson tabata un hues un tiki mas nort, un miembro di e tribu di Dan. Debora i Barak tabata mas na nort i Jefte tabata biba na otro banda di e riu Jordan. Kòrda tambe ku hopi hues a bringa kontra enemigunan kompletamente distinto. Ta hopi pusíbel, por ehèmpel, ku Jefte (ku a batayá ku Amon pariba di riu Jordan) i Samson (ku a lucha ku Filistia na parti sùit di Israel) a fungi komo hues durante e mesun periodo di tempu.

B. DEKADENSIA NA ISRAEL

E buki di Huesnan ta demonstrá dekadensia humano riba un eskala asombrante. E nashon ku a algun aña promé a primintí ku nan lo obedesé Dios, rápidamente ta kasa ku paganonan i a kuminsá adorá nan diosnan. Por mira dekadensia den diferente área.

1. Dekadensia polítiko. Ta parse ku durante era di e huesnan, kada un di e diesdos tribu a goberná nan mes. Nan lasonan religioso sentralisá tabata un di e faktornan prinsipal ku a mara nan huntú. Ma e sistema aki di unidat a resultá di ta un frakaso prinsipalmente pasobra e tribunanan a keda sin kompletá e konkísta di nan teritorio. Hopi biaha e tribunanan a enfrentá problemanan nan so. Otro tempu algun tribu a uni forsa, por ehèmpel sies tribu segun 5:14-18.

Liderato a bira un problema serio. Den kaso di e ansianonan di Galaad, nan tabata tan desesperá ku nan a invitá Jefte, un hòmpber ku su famianan a kore kun'é den pasado pasobra e tabata yu di un prostituta, kabesante di “*hòmbernan pèrvèrso*: (11:3), pa bira nan lider.

Situashonnan asina a kousa e hendenan di Israel wak e nashonnan rònt di nan i deseá un rei. Un monarkia a parse mas organisá i mas efektivu. Nan a pidi Gideon pa establecé un

monarkia. Ma el a nenga (8:22-23). Gideon su yu dj'afó, Abimelek, a hasi su mes rei di Sikem (9:6). Ma no tabata te era di Samuel ku Israel a haña un rei.

2. Dekadensia religioso i moral. E religionan di Kanaan tabata politeísta (kreensia den hopi dios). Entre otro nan a kere ku ún òf otro dios tabata responsabel pa fertilidat tantu pa ku agrikultura, komo pa bestianan i hende. Komo resultado, prostitushon religioso tabata un parti normal di nan religion. Tambe tabatin okashon ku nan a hasi sakrifisionan humano.

Pasobra Israel no a kaba deshasí di e habitantenan di Kanaan, nan a hasi aliensanan ku nan (2:2), algu ku Dios a prohibí. Esei tabata siguí pa un otro akto di desobediensia pa ku Dios: nan a kasa ku nan (3:6). Yunan di matrimonionan asina a lamta ku sinkritismo, keriendo tantu den e Dios di Israel komo e diosnan pagano, Baal i Astarot (2:13; 3:6). Finalmente, nan a bandoná Dios por kompleto.

E pikánan i fayonan di karakter visto den e huesnan ta mustra kon degenerá e era ei a bira. E storianan di Gideon, Jefte, Samson ta interesante. Ma bo no por lesa e storianan ei sin ripará nan fayonan horíbel. I kasi nos ta haña impreshon ku kada hues menshoná ta pió ku esun promé.

Ningun ta mas visto ku e fayonan di Samson, e último hues menshoná. Apesar di e echu ku e tabata un nazareo ku tur e reglanan ku esei a enserá (Numbernan 6:1-21), e no a kontrolá su pashonnan. E no solamente tabatin kontakto íntimo ku diferente muhé; ma nan tabata damanan *filisteo!* Falta di disiplina propio i inmoralidat tabata dos frakaso flagrante.

Si esei tabata karakter di e lidernan di e tribunan, kiko lo a keda di e pueblo di Israel mes? E dos storia na fin di e buki ta mustra dede riba esei. Hende tabata tan dekaí ku un yu hòmber ta hòrta di su mama (17:2-3) i henter un tribu a aprobá di homoseksualidat i violashon siguí pa homosidio (19:22-30). Di bèrdad, no tabata te ora Samuel a bira hues ku porfin tabatin un persona moral manera Moises i Josué.

Tambe ta notabel ku tur dos di e último storianan den e buki (Huesnan 17-21) ta menshoná dekadensia di parti di levitanan, lidernan religioso di Israel.

C. SÍKLONAN DEN E BUKI

Nos a nota ya kaba ku den e sekshon prinsipal di e buki (2:6 – 16:31), un síklo ta aparesé den e historia di Israel; e mésun patronchi ta keda repetí. Tin sinku diferente punto riba e síklo: apostasia (bandoná Dios), siguí pa huisio, repintimentu, liberashon, finalisando ku sosiegu.

Nos ke elaborá un tiki mas riba esaki, mirando e teksto mes. Kada biaha e síklo ta demonstrá mas dekadensia ku e síklo anterior. Huesnan 2:6 – 3:6 ta introdusí esaki, i e siguiente parti ta deskribí diferente síklo na plaka chikí. Por bisa ku tin sinku punto pa kada síklo:

1. Apostasia. Shete biaha e buki ta bisa, “*e yunan di Israel a hasi loke tabata malu den bista di SEÑOR*” (2:11; 3:7,12; 4:1; 6:1; 10:6; 13:1). Seis di e biahanan ei e ta introdusí komienso di un síklo nobo di maldat.

2. Huisio. Maske e teksto no nesesariamente ta spesifiká e piká tur biaha (2:10 – 3:5), e ta laga sa bon kla ku nan piká e okashoná Dios Su rabia (2:12,14,20; 3:8; 6:1; 10:7). E teksto tambe ta hopi kla ku *Dios* tabata Esun ku a kastigá nan dor di manda un òf otro enemigu kontra na (2:14-15,23; 3:8,12; 4:2; 6:1; 10:7; 13:1). Segun 3:12, Dios mes a fortifiká e enemigunan kontra Israel.

Fuera di nan konflikto ku e kananeonan na tempu di Débora i Barak, mayoria di nan enemigunan a bin for di paisnan fuera di e tera. Algun, manera Moab, Amon, i Madian, tempu tempu a bin “plùnder” e tera. Nan a bin durante tempu di kosecha, anto a bai ku tur kos. En kontraste, otro enemigu, manera e filisteonan, a bin na kantidat mas i mas grandi pa habitá e mesun tera ku Israel.

3. Repintimentu. Komo resultado di nan opreshon, e israelitanan a sklama na Señor (3:9,15; 4:3; 6:6-7; 10:10). Nos ta haña impreshon ku hopi biaha nan a sklama na Señor ku motivashon egoísta. Nan no a sklama n'E pasobra nan a *stim'E*. Ni asta nan a sklama na Señor pasobra nan a konsiderá esei nan *deber*...un motivashon ménos korekto. Ora e situashon tabata komfortabel, nan a lubidá mes ku Dios a eksistí. Ma, en general, ora e situashon a sali fo'i mas,

òf nan a bira desesperá, anto nan a pidi Dios pa skapa nan. Dios tabat'ei solamente pa momentunan ku a kumbiní nan.

4. Liberashon. Señor a tende nan sklamashon i a duna nan un hues pa libra nan (2:16; 3:9,15; 10:12). E libertadó ku Dios a skohe tabata empoderá pa Spiritu Santu pa kumpli ku e tarea (3:10; 6:34; 11:29; 13:25; 14:6,19; 15:14).

5. Sosiegu. Diferente biaha e outor ta bisa ku e liderashon tabata sigui pa un periodo di pas. Durante e periodo aki, e hues a goberná Israel. E teksto tambe ta konta di e morto i entiero di e hues (3:10-11,30; 5:31; 8:28-32; 10:2-5; 12:9-15; 16:31).

Dios a rekerí lealdat eksklusivo i obediensia total na Su mandamentuna. E buki di Huesnan ta duna ehèmpelnan dramátiko di e efekto di apostasia (bandoná Dios). Kada aspekto di bida tabata afektá: politiko, religioso, sosial, familiar, èts. Por nota un oumento grandi den immoralidat. E buki di Huesnan ta ilustrá bon kla loke Proverbionan 14:34 ta bisa: *“Hustisia ta halsa un nashon, ma piká ta un bèrguensa pa kualke nashon”*. Maske kon glorioso Israel su pasado tabata, esei no ta impreshoná Dios awe! Nan mester sigui biba pa Señor awe!

D. HUESNAN DEN E BUKI

Den e buki di Josué e sumosaserdote a hunga un ròl importante. Asta e último versíkulo di e buki ta menta nòmber di dos sumosaserdote (24:33). En kontraste, straño ku por parse, ningun sumosaserdote ta menshoná den e buki di Huesnan. Di bèrdat, ningun saserdote legítimo ta menshoná den e buki aki. Ta komo sifuera e lidernan spiritual tabata konsiderá innesario durante e era aki.

Esaki ta un buki tokante huesnan. Algun hues a destaká mas ku otro. Nos ke hasi algun opservashon di e huesnan prinsipal. Mirando nan, nos por haña un bista di e dekadensia ku tabata tumando lugá.

1. Otoniel (3:7-11) ta presentá komo un hues modelo. Dios a skoh'é, e tabata un bon lider militar, di kalidat di Josué.

2. Den e relato di Aod (3:12-30), tin punto importante ku ta hasi falta. E teksto no ta bisa ku Dios a skoh'é. Tampoko e ta bisa nada di Dios Su relashon pa kun'é. Aod a libra Israel dor di engaño i astusia.

3. Débora tabata un profetisa ku a huzga Israel (4:1 – 5:31). Apesar di e viktoria aplastante, un inkietut ta molestiá e lektor: unda e liderato maskulino a keda? No tabatin asta ún hòmbler ku por guia e ehersito den bataya? Di bèrdat, Barak no tabata e komandante viktوريوس. Tabata un hende muhé, Jael, ku a gana e bataya dor di astusia.

4. E kunukero, Gideon (6:1 – 9:56), tabatin mester di tres milager pa konvens'é pa obedesé Dios. Asta ora e ta obedesé, e ta hasié anochi (6:25-27)—no un portrèt di un hòmbler balente. Ma apesar di un viktoria milagroso, ora 300 sòldá israelita a vense un ehersito grandi, e mes bai tras di idolatria (8:22-27). I pronto e tabatin hopi esposa i konkubina i setenta yu hòmbler (8:29-32).

5. Abimelek (9:1-57) no tabata un hues. E tabata yu di Gideon i un konkubina. Dios no a selekt'é; el a skohe su mes. E luchanan ku tabatin entre tribunan (8:1-9) den era di Gideon awor ta bira bringamentu den famia i Abimelek a mata kasi tur setenta ruman. Apesar di tur e bon ku Gideon a hasi pa ku Israel, su yu tabata un opresor.

6. Jefte (10:6 – 12:7), rechasá komo yu di un prostituta, lider di bandidonan, tabata yen di interes propio. E ta viktوريوس den guera, ma ta pèrdè su úniko yu. E viktoria ta sigui pa pleitu i guera sivil entre tribunan.

7. E último hues menshoná, Samson (13:1 – 16:31), tabata un persona ku Dios a selektá fo'i promé ku el a nase. Ma el a biba riba un nivel hopi mas abou ku e tabatin potensial. Samson a biba pa sasia su mes deseonan seksual na lugá di kontralá nan. Nunka ta gana un bataya militar. Di bèrdat su morto tabata mas eksitoso ku su bida (16:30).

Ta fásil pa nos muestra un dede akusante riba e huesnan yen di defekto, ignorante, inkredulo, desobedesido, ku motivashon robes. Ma kua di nos tin algu di gaba? Segun 1 Korintonan 6:11, *“I asina algun di boso tabata, ma boso a wòrdu santifiká, ma boso a wòrdu*

hustifiká den nòmber di señor Jesu-Cristo...” I apesar di tur nan frakasonan, nos por siña for di nan fe. Hebreonan 11:32-33 ta inkluí Gideon, Barak, Samson, i Jefte komo hòmbenan di fe.

Ora e buki ta sigui, e situashon di Israel ta peorá. E viktorianan aplastante di Débora i Barak i Gideon ta sigui pa esfuersonan ménos konvensiente di Jefte i Samson. Jefte a vense Amon, ma no a prevení guerra sivil. Samson a hasi kosnan grandi riba un eskala personal, ma no por a libra Israel for di e filisteonan. Na fin di e buki, e storianan di piká i guerra sivil ta riba un eskala muchu mas horibel ku na komienso di e buki. E nashon tin mester urgente di unidat. E outor ta keda ripití ku no tabatin un rei na Israel pa mustra ku monarkia ta di preferá ku anarkia. E implikashon ta ku un nashon goberná pa un rei dediká na Señor lo eksperensia e bendishon di Dios.

E. DIOS DEN E BUKI

Diferente punto ta destaká di Dios den Huesnan. Entre otro, Dios ta fiel. Israel tabata infiel na Dios rípidamente. Ma tòg El a keda fiel. Dios Su pasenshi ta destaká relashoná ku esaki. El a skucha nan sklamashon pa liberashon i a duna nan un otro chèns. E ta un Dios rekto. El a kastigá piká. E ta soberano, usando otro nashonnan pa kastigá Su pueblo. E por salba sea ta ku hopi òf ku poko. Dios Su soberania tambe ta visto den e echu ku maske Israel a desobedesé Dios i no a kore ku e habitantenan di Kanaan, tòg el a usa e enemigunan aki pa prepará un generashon mas hóben pa guerra (3:1-2). I apesar di Samson su falta di dominio propio pa ku muhénan filisteo, tòg Dios a usa e piká aki pa kibra algu di e poder di e filisteonan (14:4).

F. JEFTE SU SAKRIFISIO DI SU YU

Promé ku Jefte a bai bringa kontra Amon, el a primintí Dios, *“Si di bèrdat Bo entregá e yu hòmbenan di Amorn den mi man, e ora ei kiko ku sali for di e portanan di mi kas pa kontrami ora mi bolbe na pas for di e yu hòmbenan di Amon, lo ta di SEÑOR, i lo mi ofresé esaki komo un ofrenda kimá”* (11:30-31). Jefte a gana e bataya. Su úniko yu, un yu muhé, a sali pa kontr'é ora el a bolbe. Tin hopi interrogante si Jefte di bèrdat a mata su yu i kim'é komo un sakrifisio pa kumpli ku su promesa? Diferente estudiante di Beibel tin diferente kontesta. Nos lo no resolvé e pregunta aki. Ma simpelmente lo presentá ambos banda.

E práktika pagano den mundu antiguo di sakrifiká un yu tabata algu ku a tuma lugá den tempu di emergensia (2 Reinan 3:27). Maske un sakrifisio humano sigur no tabata Dios Su boluntat, Jefte, influensia pa e kultura pagano di su era, lo a hasi presis loke el a primintí. No tin otro manera pa splika e teksto ku pa yega na konklushon ku Jefte a hasi un sakrifisio humano literal. E buki di Huesnan ta mustra e kondishon degenerá di pueblo di Dios. Esaki ta simpelmente un otro ehèmpel di e degenerashon di Israel—asta nan lidernan—den e era aki.

Ma otro teólogo ta haña ku Jefte no a mata su yu komo un sakrifisio. Nan ta usa diferente argumento. (1) Dios a instruí Su pueblo kla ku sakrifisionan humano tabata un ofenea p'E (Levítiko 18:21; 20:2-5; Deuteronomio 12:31; 18:10). Jefte a teme Dios, i sigur lo tabata sa ku un sakrifisio humano ta kontrario di Dios Su instrukshon. (2) Jefte su yu muhé permití dos luna pa lamenta su birginidat, no su morto (11:37-38). (3) Despues ku Jefte a kumpli ku su promesa, e teksto ta bisa ku *“e no tabatin relashon ku hòMBER”* (11:39). Ta innesesario pa mensioná esei si el a muri. Ma si Jefte a dediká su yu muhé pa sirbi Dios bida largu na e tabernakel sin kasa, esei ta splika e frase ei. (Tabatin mas muhé *“ku tabata sirbi na entrada di e tèt di reunion”* [1 Samuel 2:22]. Ana por ta un otro ehèmpel di esaki [Lukas 2:36-37]). E situashon tabata tristu pasobra komo ku e tabata Jefte su úniko yu. Jefte no por tabatin desendiente, algu konsiderá horibel den e kultura di Israel.

Un mensahe kla ku e buki di Huesnan ta komuniká kla ta: frakaso ta resultado di kompromiso. Pasobra Israel no a hasi esfuerso pa destruí nan enemigunan na komienso, nan a wòrdu derotá dor di enemiguna. Piká i sufrimentu ta inseparabel pa e yu di Dios.

Ta meskos ku nos awendia. Si bo ta hunga ku piká, ta toler'é den bo bida, bo lo wòrdu kontaminá. Si bo no ta pèrmití Señor Hesu-Kristo kontrolá sierto área di bo bida, tempran òf lat

e enemigu lo usa esei pa derotábo. Bo nunca lo gosa libertat real si bo no ta trata svero ku piká den bo bida. Dos Korintionan 6:17 tin rason, “*Pesei, sali for di meimei di nan i separá boso mes, SEÑOR ta bisa. I no mishi ku loke ta impuru; i lo Mi risibí boso.*”

Tantu kreyente ta biba meskos ku paganonan, ma tòg ta purba duna impreshon di ta spiritual. Esei ta hipokresia. Nos tin ku evaluá nos mes bidanan bon pa nos no kai den e trampa aki.

Literatura Konsultá

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 299-306.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, p. 7-23.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 75-76.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 19-127.
- Wold, Herbert. Gaebelin, Frank E. ed. *The Expositor's Bible Commentary*: (Grand Rapids: Zondervan Publishing House, 1988), vol. 3, p. 373-384.
- Cundall, A.E. Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p. 739-758.